

本朝分省人物考

人物考卷之四十四目錄

浙江嘉興府一

王嘉會

程本立

楊任

鮑恂

貝瓊

顧光遠

葉春

陸宗秀

殷近仁

過宗一附孫橋厚

俞山

呂原

項忠

沈琮

周衢

沈肆

張寧

姚綬

馬璇

倪輔

俞迺

潘蕃

呂憲

過璘

屠勲

包鼎

馬昆

劉偉

陶照

項經

陸淞

沈煥

吳昂

屠珪

卞諶

孫璽

錢 錡

陸 琳

趙 漢

陸 杰

諸 備

劉 玘

沈 圻

姚 參

林 桂

滿 正

盛 唐

沈 科

吳 淞

姚 弘謨

馮 臯謨

沈 伯龍

賈 名儒

戚 元佐

王 文祿

呂 炯

卜相

屠元沐

俞乾

采煉

姚弘

馬呈圖

本朝分省人物考卷之四十四

浙江嘉興府一

王嘉會

王嘉會字原禮浙江嘉興人少博洽負俊聲元末累舉不第乃客松江爲人溫淳和緩後進樂就講論修艇戶恒滿上海令康伯愚見其詩詞敦雅敬禮之引爲上賓使以文章飭已吏事會詔舉明經嘉會應聘至京高皇帝命賦詩應制稱旨復試其文賞異之除授翰林院檢討洪武十五年陞國子右司業時宋訥爲祭酒太學生常數千人嘉會與訥及左司業龔

數嚴立楷範三人者春秋已高鬚髮鬢如正其衣冠  
旦夕端坐諸生雲集階下肅然望而畏之以是士類  
率教多所造就 上知其勞眷待殊厚十六年冬以  
老疾乞歸優詔調治十七年特賜致仕未啟行嘉會  
卒於官舍年八十餘 上深嗟悼命禮部移文應天  
府給舟車還其喪及發引之日詔命所在官司備禮  
祭之

程本立

程本立字原道崇德縣人少讀書不事章句受學金  
華朱彥亨兄弟造詣日深又從同邑鮑恂貝瓊游議

論侃侃負氣節洪武丙辰舉明經秀才擢奉王府引  
禮舍人召見奉天門賜馬疋楮帛改周府丁卯從王  
入覲坐累謫雲南龍池郎甸長官吏目留家大梁自  
以一僕之任時所部內附未久蠻夷皆煽動爲變西  
平侯沐英布政使張統聞其賢皆禮之委以統領守  
禦所在撫綏本立山行野宿不避艱險自楚雄姚安  
以逮大理鶴慶麗江等處咸賴其安輯每單騎入蠻  
夷境或爲書開導順逆利害遇飢卽便宜賑恤曰吾  
爲王官守禦邊方不可以文法自諉坐視夷民生患  
假令死卽死我一身耳救則救此一方之人也諸夷



聞之皆感悅自是軍得著伍民得安業本立之功居多歲戊寅奏計京師建文帝立學士董倫應天府尹向寶交章薦其文學治行時方修太祖實錄召入翰林編纂支正七品俸署左僉都御史階中順大夫作御史箴以自勵尋卽真俸入之外不通餽謁時稱爲清御史嗣後實錄完出爲江西按察司副使未行適靖難兵已進京師本立知事不競悲憤自盡三日成廟卽位 詔追奪恩典家無遺資所著有巽隱集十卷刊行於閩今祠於學宮同時纂修者如學士董倫等皆免於難或見用新朝焉

## 楊任

楊任浙江嘉興人母章氏初生任有胡僧過之聞啼聲歎曰此兒異日必顯終不免刑僂耳任性至孝嗜學洪武間由人才擢知袁州府黃子澄一見以國士許之守袁政多宜民北師起任引疾歸壬午事定子澄出徵兵往約蘇守姚善航海去善不可子澄乃至任家與任謀求舊君圖大舉事泄任與子澄俱被擒至京磔于市任子禮坐死籍產族誅凡九十三人任姁屬金莊章范諸姓發戍邊者又百餘家云

## 鮑恂

鮑恂字仲孚本崇德人後徙嘉興西溪父德歸安承  
恂領元浙省鄉試學士張翥御史劉彥博薦爲翰林  
不就洪武初禮部舉吉安余詮高郵張長年及恂輩  
明經老儒達於治體可備顧問遣使召至京師恂年  
八十餘長年七十餘上見之甚喜賜坐顧問一日

上召恂等命爲文華殿大學士輔導東官恂等固辭  
上諭之曰以卿等年高故授此職煩輔導東官耳免  
卿早朝日晏而入從容侍對不久隨卿致仕歸鄉以  
終餘年庶不負平生所學於鄉里亦有光榮恂等復  
固辭翼日放歸恂受易臨川吳澄得其所著易傳大

義及西溪漫稿行世學者尊之曰西溪先生葬千金鄉

貝瓊

貝瓊字廷臣嘉興崇德人性坦率不事邊幅而篤志好學博通經史百家之言善爲文年四十八始領鄉薦張士誠據姑蘇累徵不就洪武三年被薦脩元史旣成編受賞而歸六年以儒士舉至京師除國子助教嘗慨古樂不作所謂成均徒有其名廼作大韶賦以見志宋濂之爲司業也建議於朝謂當立五學並祀舜禹湯文爲先聖高皇帝不用其說且黜辱之

然士大夫猶有躋濂者瓊乃作釋莫解解曰三皇何人也曰古聖人也曰其爲聖人也若何曰庖羲氏闢天下之文神農氏興天下之利黃帝制器尚象以通天下之變此爲治者莫過於三皇也乃至於孔子不得如三皇脩君師之職於是刪詩書正禮樂贊周易脩春秋以明綱常於萬世德雖同而事則殊矣然則祀三皇於學以孔子配之可乎曰不可以三皇爲先聖以孔子爲先師奚爲不可也曰又各有所當也按周禮有道有德者使教焉死則以爲樂祖祭於瞽宗故文王世子篇曰凡學春官釋奠於其先師秋冬

如之若禮有高堂生樂有制民詩有毛公書有伏生  
皆先師之類也又凡始立學者皆釋奠於先聖先師  
釋者曰先聖若周公孔子之下云凡釋奠者必有合  
也有國故則否蓋謂國無先聖先師則所釋奠者當  
與鄰國合若唐虞有夔伯益周有周公魯有孔子則  
各奠之不同也是唐虞與周所主先聖先師固無定  
名未有及於三皇也再稽之史漢魏之王取舍各異  
周孔迭爲先聖孔顏互爲先師若周公制禮作樂宜  
享王者之祀於是罷周公升孔子配以顏子高宗永  
徽中又復武德舊制顯慶二年以長孫無忌言正孔

了爲先聖仍以周公配武王歷宋迄今釋奠孔子定  
爲不易之典是唐宋所主先聖先師已有定名未有  
及於三皇也嗚呼太古以來人若禽獸然寒無裘暑  
無葛飢則木食渴則谷飲無五穀以爲養也疾病相  
仇無醫藥以濟其夭死所處或巢或穴無上棟下宇  
之禦風雨川游陸走無舟車之安也其事簡其俗淳  
結繩而治無文字之可紀也三皇繼作而後人之爲  
道始備此衆人疑其不祀三皇者爲缺典夫三皇宜  
祀而不得祀之於學也惟孔子當周之不振憂道之  
失與諸子講於洙泗之間以述三皇之所傳故宰我

曰以予觀於夫子賢於堯舜遠矣子貢曰自有生民以來未有盛於孔子者也孟子曰孔子所謂集大成也者金聲而玉振之也宜爲百王之宗主萬世之所法所以祀之於學也學始無孔子廟惟魯有廟然其教被於天下非一國所得專者故天下通祀之自唐已然虞世南韓柳諸記可考矣學之有廟由孔子而建則宜以孔子爲先聖顏子爲先師而三皇不預也盛矣哉孔子之道中國尊之夷狄尊之爵以文宣王列二十四戟冕十二旒服十二章執鎮圭巍然南面而坐祭則牲太牢樂大成舞八佾於庭其所以尊孔



子者又豈以是爲加歟不如是不能稱其德周太祖  
屈萬乘過闕里拜其像又拜其墓視漢之高帝明帝  
尤重其禮論者亦不以爲過是真觀之制出於天下  
之公而非一人之私歷閱萬世不可易者今欲崇三  
皇爲先聖使居孔子之上不足以褒其功降孔子爲  
先師使混於高堂生之列適所以貶其德故吾的然  
以爲不可也或又曰古者祀舜於虞庠祀禹於夏學  
祀湯於殷學祀文王於周學舜禹湯文得以祀於學  
而不得祀三皇何拘於貞觀之制耶曰王天下立四  
代故祀舜湯文而三皇將祀之於何學歟或曰先生

詳言之曰三皇孔子其道一也崇孔子之祀當崇三皇之祀焉以佛氏之苦空寂滅老氏之荒唐怪誕無益於人與國且崇臺廣殿儼於王官法亦弗之禁矧三皇之功及於人者如此而領之於醫特主神農膏藥之一事理固有未盡者宜定其制設官主之以豐其祀可也祀之於學則非義矣時余爲國子助教適聞有以邪說言於朝破貞觀之制者旣斥而不用余懼其惑人也故辯之其持正論類如此九年遷中都國子助教教勲臣子弟瓊爲人文行超越素有名譽雖將校武夫皆知禮重十一年九月致仕明年卒

卷四十四  
七  
陶仲  
於家有清江文集二十卷行於世

顧光遠

顧光遠嘉興人洪武中以掾從擢知龍陽州招附懷  
來浚城輯士民賴以息改知泰和州時亂久粗定民  
好訟稱難治前守吳去疾禁訟者或以告光遠憮然  
曰民有冤守弗爲之理民安所訴乎頃之訟者雨集  
光遠乃自爲榜聯紙長數丈誨諭諄切民爭來觀觀  
已去不訟者十一二已又俾凡訟者居樵樓上思三  
日然後訴不三日去不訟者過半矣於是擇吏純謹  
者一人置簿受訟詞而勾稽之民誠冤輒爲之疏理

非誠負冤願悔自止者聽不問未兩月而訟清乃吏  
又畏光遠精敏毋復敢舞文者境有虎適其時禁民  
蓄兵械虎益暴光遠草檄告神虎一夕遁去州以大  
治光遠澹泊無營所居廨無長物藝蔬自食於民事  
無巨細必盡其心去廣日民遮道號攀欲爲立石會  
有禁不可乃止吳守安慶人爲泰和最賢且勞顧繼  
之稱二賢守云

葉春

葉春字景暘海鹽縣人幼警敏知學有才識洪武中  
舉自邑史歷事吏部者六年永樂初禮部尚書李志

剛知其通練廉謹薦於朝擢主客司主事以勤敏周密爲上官所重三年陞本部郎中丁內艱去服闋仍舊職三考以績最陞兩淮都轉鹽運使歲餘丁外艱服闋改福建布政司右叅政 仁廟嗣位來朝遂與廣西右布政使周同被璽書巡視應天鎮江蘇常湖松等八郡訪民利害而建革之歲餘歸宣德初復詣蘇常諸郡者再已改四川布政司右叅政又二年拜侍郎又二年而卒春秋六十有四

陸宗秀

陸宗秀平湖人樞密副使旋吉九世孫爲人敦朴有

至行與弟友愛甚篤永樂甲辰應賢良詔與陳繼等  
二十三人徵至京師仁廟新御極宗秀方巾布袍  
引見于便殿上異其禮貌命至展前問曰如何則  
天下太平宗秀叩頭對曰皇帝親賢納善大臣秉  
公持正自然太平上悅曰好言語公卿在列者皆  
竦然留月餘以疾辭賜寶鈔銀幣還正統五年歲  
饑宗秀傾家出粟助賑事聞賜勅褒獎表其門曰  
尚義

殷近仁

殷近仁嘉興人博學能文與其弟原誠原善友愛無

間言家貧親老同心協力以供甘旨之養近仁洪武  
初以孝弟與授山西平遙知縣未幾親喪葬祭盡禮  
服終以所著蒞政戒銘四十二篇獻之於朝擢廣西  
叅政

過宗一 附孫橋 厚

過宗一字貫之平湖人生當元末矢志以聖賢期許  
父早喪獨與母居張士誠陷姑蘇聞其才畧欲收爲  
用遣使踵門迎之宗一以養母辭堅執不赴士誠復  
以兵劫之宗一負母逃海上因其不屈欲殺其母宗  
一以身蔽母面被數鎗卒憐其孝舍而去以孝終所

居有烏鵲連巢之異國初以事聞建坊旌之越百餘年有七世孫橋者號龍濱少而孤事嗣母至孝所得嗣產悉推與弟且好施與親戚之貧而無妻者皆爲置室甫四旬卽舉明經冠兩浙以母年老朝夕承顏不肯舍之去竟不赴廷試母病輒焚香刺股未逾年而終萬曆年間與宗一建雙孝坊八世孫厚號九山孝友忠信確守祖父家風族有負積逋而應遣者將所得嗣伯過槐產推以與之賣償積逋得免於戍里人有妾死非命者夜懷百金求解於厚厚爲解其事而不受其金蓋雅勵彥方諸君子之風節者爲諸



生年未四十而卒楚宗伯劉衡野誌其墓

俞山

俞山字積之嘉興府秀水縣人自幼風骨秀爽志趣不凡弱冠補郡庠生治春秋從西園李先生講學專業不懈至忘寢食踰年卽得與義永樂癸卯領鄉薦以祖妣周氏年老不忍去左右就養者三載宣德丁未乃入太學時祭酒四明陳敬宗師道尊嚴慎許可六館之士肅然惟待山以色庚戌春遂中乙榜人或諷之曰以子之才乃屑就耶山曰命也不可強遂得蘇之崑山訓導崑山之士樂其善教莫不爭先奮勵

底於成俄丁外艱諸生有隨之抵家受業者正統丙辰服闋調常之宜興克端身範士習丕變未幾丁祖母憂宜興之士思之不置爭詣提學御史留之弗果正統庚申服除赴京時朝廷嚴勅吏部擇儒官以輔親藩人皆托故避之山曰顯晦自有定數吾何避爲遂選擇邸王府伴讀既居其職若將終身日勤講說不少輟祿微窘略不介意弟子從遊者益衆正統己巳景帝嗣位進鴻臚左寺丞時都御史楊善掌寺事雅重之薦陞左少卿踰月拜吏部右侍郎尋轉左侍郎時有以易儲請者山密諫不聽退曰禍機自

此始矣乃引疾上疏乞骸骨不許踰年請之益切人或謂曰委任方隆疾已漸瘥何苦欲休山曰隆替相尋亦理之常吾非不戀明時揣分宜休况以疾乎復上疏懇辭賜乘驛舟以歸卒於途年五十有九山爲人敦厚簡靜在藩邸時常衍訓經書纂成講章尤善諷諫屢有裨益及顯用之日不市私恩人皆稱爲長者景泰初議迎復之禮奮然曰鑾輿回則人心安力贊其成言官有持正被疾者曲爲調護竟致顯用其佐銓衡人才多所拔用未嘗自言曰薦賢爲國豈爲私也

## 呂原

呂原字逢原秀水縣人自幼穎敏九歲能通孝經小學稍長爲文輒驚動長者時父嗣芳與兄俱爲教官識者曰此子殆穎脫而出者也未幾父兄俱卒於景州原尚未成童孤貧不能歸喪或諷以胡俗焚之者原潛然出涕不從遂厝州城之東曰他日有力必歸之也年及弱冠乃奉其母歸家益貧攻苦力學知府黃懋閱秀水學官文奇之學官對曰此邑里中呂生文也呂生貧不能補弟子員學官致家塾教諸子懋輒嘆郡中乃有文士如呂生遺草萊中者急召之見

原入見衣藍縷甚試之舉業文詞理皆勝問之經書輒能默誦懋益驚異與之新衣謝不受會理葺黌舍與之諸餘材木又謝不受懋曰生家貧鬻此且得善價又謝不能太守益大奇之當是時太守得輒補學諸生懋卽遣送入學是秋發解浙江正統辛酉年也明年中禮部會試廷對賜進士及第第二人擢翰林院編修得入秘閣讀所未見書其學益富癸亥與修五倫書賜寶鏹丁卯 朝廷思用奇才乃簡狀元劉儼等十人進學東閣入侍經筵原居其一景泰初遣祭蜀王往還萬里間凡有饋送一毫不取未幾充經

筵講官辛未進侍講壬申夏以右春坊右中允兼侍  
講癸酉與修歷代君鑑秋八月主順天府鄉試丁丑  
與修寰宇通志明年書成進右春坊大學士兼侍講  
每書成進講輒有寶鏤白金文綺之賜天順改元

英宗復辟轉通政司右叅議仍兼侍講春三月主禮  
部會試夏六月徐有貞旣黜薛瑄請老乃召原與岳  
正入內閣知制誥尋進翰林學士庚辰春主禮部會  
試尋總裁大明一統志凡金帶玉杯貂帽便蕃之賚  
歲無虛月原夙夜感激思盡論思之職時以丁母憂  
啟父櫬歸西而葬之詔有司營葬祭乞終制不允抵

家忽得風疾不起年四十五計聞特贈禮部侍郎謚  
文懿葬祭如制仍命其子憲爲國子生皆異數也原  
天性孝友事母得其懽心撫育兄子皆底成立宗族  
中有困乏者必推所有以賙之遇人之危殆者濟之  
惟恐不及也歲時賞賚奉母之餘輒分遺鄉黨僚友  
而自奉甚薄爲人沉毅有醞藉悃悃無華內端外和  
與物無競處已待人立崖岸事有不可則據理諍  
之未嘗諛言媚色以徇人取悅三爲主考取士得人  
最多初入翰林時楊文舉入京文舉公咸器重之知其  
所就必遠大及入內閣見出人意表而爲

民之心尤切天下有陰受其賜者矣惜其享年不永云

項忠

項忠字盡臣嘉興縣人正統壬戌進士授刑部主事  
戊辰轉員外郎十四年己巳扈從北征羈留虜中飼  
馬忠仰天竊歎日圖歸事 本朝久之挾二良馬而  
南越四日馬疲遂棄馬步奔間道攀巖涉澗凡七晝  
夜達宣府視其足陷蒺藜刺者百數及還陞郎中景  
泰二年陞廣東按察副使按部高州謀報賊携男婦  
數百流劫村落部將請發兵忠曰流賊無携家理慎



無妄殺及訊其俘果皆良家被掠者盡釋之癸酉從  
都御史馬昂征瀧水獯賊有功加從三品俸是歲丁  
父憂服闋改山東副使天順三年陞陝西按察使適  
陝飢以拯民爲已任不待奏報輒發倉賑之全活以  
萬計壬午聞繼母喪陝西軍民赴闕留者千人詔  
奪情還任明年以大理寺卿徵旣行陝人復詣闕  
留天子欲慰陝人乃改右副都御史仍撫其地  
軍民喜其來爭焚香遠迓歡聲如雷甲申洮岷生熟  
番作亂忠調兵撫捕之遂降其衆成化元年虜犯延  
綏忠與寧遠伯任壽調兵禦之虜遁去關中水泉斥

鹵舊有龍首渠歲久湮廢居民病之忠奏開一渠餘三十里涇陽鄭白渠亦久廢奏募工疏通於平地則度勢高卑而穿渠遇嚴則聚火鎔鑠而穿竇不二年而成名曰廣惠渠凡灌田七萬頃人懷其惠立生祠祀之二年虜酋毛里孩入寇命忠提督軍務與彰武伯楊信禦之戰屢捷虜復遁三年 召還佐院事四年戊子固原土達滿四謀叛不三月間聚衆二萬據石城將舉大事遠近戒嚴守將寧遠伯任壽等率兵剿捕兩被殺傷都指揮費良死之事聞衆推忠 詔忠總督軍務同都督劉玉討之伏羌伯毛忠戰死我

軍遽退忠卽陣斬一千戶以殉衆乃定會有星孛於  
台斗中外詢詢占者以木在秦州不祥忠曰賊虐害  
生靈惡慣滔天今仰仗 皇威問罪師直而壯兵法  
曰禁祥去疑昔李晟討朱泚熒惑守歲卒以成功今  
殆類此乃不候援至卽以師據賊水草坐困其勢

朝廷尚慮師淹歲月 詔問忠可否益兵忠卽上疏  
謂京軍怯不諳戰益之無補時兵部及兩侯伯上章  
者惡忠異已各煽浮言忠堅王坐困之策與賊相持  
百日彼漸有欲降者忠乃以二卒自隨單騎入寨曉  
以禍福於是賊中脅從之衆相率來降而滿四乃夜

使愛將楊虎狸者出營遠汲被擒忠先揚言斬之虎  
狸乞命乃諭之順逆許以不死解所束金鈎賜而遣  
之約爲內應以故滿四卒爲虎狸所賣擒斬并俘獲  
者無筭賊平因陳四事爲經久計 上皆從之先是  
忠日披堅於石城下督軍殺賊雖矢石如雨略無懼  
色鈎陽馬文昇嘗勸其持重忠曰奉 命討賊久無  
成功死所甘心輿論偉之五年還京以功陞右都御  
史仍佐理院事庚寅秋京畿大水民饑命巡視順天  
河間永平三府忠發官廩又勸分得米十六萬五千  
石銀布牛俱各萬餘全活不可勝計是年冬荆襄賊

劉千斤餘黨倡流民爲亂復總督軍務討之乃遣人持榜入山召諭其負險不服者總兵按捕凡遣發還者百四十四萬編戍者萬餘斬首二千餘級獻俘於朝者百餘人仍獻便宜十事 詔暫留撫治進左都御史會有星變言者謂荆襄殺戮所致忠再疏自列因乞骸骨溫詔召還後荆襄三十餘年芽孽不作皆其摧創之力也十年陞刑部尚書踰月改兵部尚書忠曉暢戎務簡賢屬以自輔十三年錦衣百戶韋瑛者挾汪直爲調察屢與大獄至擅執京朝官中外重足莫敢正言其非奮筆具疏草倡諸公卿奏之瑛坐

戍邊 朝野稱快而其黨競讐忠不置又有千戶吳  
綬先在荆襄撓軍法爲忠所出時亦用事極力朋搆  
欲寘之死忠廷辯慷慨不少屈僅坐落職以去久之  
陷忠者次第皆敗 上洞察其枉復兵部尚書致仕  
自去官家居者二十有六載中朝縉紳論舊德宿望  
可當大任者蓋未嘗不屬望焉弘治初吏部侍郎彭  
韶巡視兩浙嘗薦其可用而遘疾竟不果起贈太子  
太保謚襄毅大學士謝遷云自文武判爲兩途章甫  
逢掖之士克任軍旅者寡矣 先帝嗣統之初四方  
多警赫怒徂征公以文儒屢當董師之任所向克捷

以彌大有爲之治求之簡冊所書如公者亦豈可多得哉

沈琮

沈琮字公禮平湖人由正統壬戌進士授南京武庫主事遷夔州守以喪未赴後補廣州以病歸卒自少穎悟卓有志操居家奉先事親情丈俱備教諸子弟有儀範鄉人化之居喪與弟理廬墓六年不苟葷事聞詔旌表其門

周衢

周衢字士亨平湖人朴雅弗事華靡時當新創人文

未著衞篤學慕古景泰元年領浙江鄉薦任膠州學正以禮率人訓迪無倦諸生有衣食不給無力喪塋者出俸助之致政歸肆力經史爲身心性命之學所著詩文追躅古人立心行已皆可對人言者

沈 肆

沈肆字公貴平湖人琮之弟發解浙省景泰辛未進士任山東監察御史早負警敏八歲能文稱爲奇童與兄琮齊名而尤穎異居官廉介有風裁服父母喪兄弟墓廬不茹葷味者六年著述有程朱書數讀史備遺藏於家



張寧

張寧字靖之浙江海鹽人七歲題畫龍有莫點金精  
恐飛去之句景泰甲戌會試考官奇其文擬真第一  
不遂侍郎姚文敏讀之驚問曰得非張寧耶授禮科  
給事中謇諤自將遇事敢言宛平等縣以買辦繁重  
奏乞均平坐派又法出弊生與其踏勘莫若節省以  
甦貧困順天府鄉試內閣大臣陳王以其子不舉歸  
咎劉文介幾中傷得罪寧奏元宰私其子陪考官失  
大臣體難居內閣乞令罷歸聞者竦然 英皇復位  
因災日御齋宮以祈消弭會六科乞詔在京衙門將

秕政苛法所當改革者悉奏舉行勸上尤當專慮  
澄心嚴恭寅畏隱微冥漠一念轉移優詔允答太監  
吉祥忠國公石亨恃迎駕之功竊弄威福寧舉奏無  
避聲焰滅戢朝鮮國讐殺毛憐衛朝廷將往問罪  
而難其人忽內降差寧與都指揮武忠偕既行得遼  
東奏兩夷讐殺狀勅諭急差追留取便進止時次遼  
東拜勅言君仁臣忠敢自便乎卽語鎮守等官調官  
軍肅陣直前旣至導揚威德陳讐禍福君臣感悅相  
視震愕謂朝廷有人識者謂此行不減重兵十萬卒  
以安戢憲宗嗣位首勸進經筵講大學衍義部院

缺尚書等官言宜取王竑李秉回京擢用奏定贈添  
天下鄉試舉人名額並俞允有建言請以天縱二字  
加號孔聖 上言孔子道大德尊所貴明理行道被  
之天下萬世不在封號求勝於一字一名得可輕重  
上從之太監覃苞累遣人邀與相見尚書姚文敏諸  
公咸勸之行卒不往他日以事會語一不及前事覃  
甚叩之 皇太后遇壽誕設齋醮禮官歛大臣金錢  
祈福寧言人臣但當和衷敬德仰贊聖孝上綏懿祉  
釋老不當崇奉辦香非可祈祝行之祇壞風俗傷民  
教南京給事中王徽等劾南陽獲罪謫邊合六科申

救甚力以故諸大臣益忌嫉之適廷薦寧及岳正可  
任騰清黃侍郎都御史者竟陞知府汀州至汀先教  
化後刑罰盡除厲民弊政勵學生造祭器八百事表  
節義恤孤獨禁遊惰郡事一新寧偉貌修能雄文直  
道才高不下人人以故摧挫之銜命萬里專對不辱  
出守南郡勤恤民隱早見遄歸養高林壑閑家有則  
孤踪無玷如寧者出則爲天下士處則稱鄉先生者  
也

姚 綬

姚綬字公綬嘉善人也少攻古文辭天順中第進士

爲監察御史巡鹽兩淮鈎剔積弊淮饑畫策賑濟流  
民賴以全活璽書褒獎後出知永寧以母老辭歸作  
滄江虹月舟遊泛甚適書畫妙絕一時詩文暢逸所  
著有大易天人合旨及雜集若干卷行世

馬璇

馬璇平湖人由天順甲申進士任行人使山西河南  
四川湖廣諸藩砥礪名節餽遺一無所受陞南京雲  
南道御史嚴毅正直不避權貴行部所至百職震懼  
因其姓稱曰誠驄馬御史也以直聲聞於朝

倪輔

倪輔字良弼平湖人生而穎異書過目輒成誦解旨趣由天順甲申進士授刑部主事三載遷郎中廉奸革弊權貴怵以威弗怯誘以利弗動士論難之嘗奉命冊封秦楚二藩餽遺槩却不受歸惟圖書數冊而已居常卜地葬親術曰不利於鄰遂弗用起復陞湖廣叅政以廉律已以仁育民治峒猺恩信所及無不感慕卒於官士民如失怙恃所著有類劇藏稿獻笑存稿藏于家

俞 迪

俞迪字允吉平湖人以天順年鄉貢任廣東都司斷

事朴茂好古清操凜然諸方岳皆敬憚之有指揮王  
江失機監司欲并坐于指揮屬廸案之廸曰國法失  
機死者不得襲于非其罪可無白乎力爭之監司卒  
如廸議貸之於是于潛以千金爲謝堅拒不受三年  
掛冠歸于泣拜曰祖父汗馬之勞子孫幾失之得公  
以延德豈敢忘公大義凜然他無敢請矣願以弱息  
奉箕箒廸曰余老矣萬萬不可次孫尚未婚以爲媳  
于益感德結婚而歸行李蕭然空乏終世鄉閭士大  
夫誦不置口

潘蕃

潘蕃字廷芳崇德人初姓鍾後復姓成化丙戌進士授刑部主事歷員外郎以廉平稱嘗勘山西沁源王奏知州金澤奸事置校尉李成于極典太監錢能鎮雲南攫金蠻部立請正法時以不附中貴出知安慶復忤權要調鄖陽多惠政叅知貴州政事都勻變叛給餉畫討師賴以濟歷陞山東湖廣布政所至旬宣茂著擢都御史巡撫四川兼提督松藩等軍務因上五議請擇官守備以修邊務暫免徵解以甦民困折徵鹽課以備凶荒經理屯政以便徵納申嚴禮法以塞訟源又以松藩儲餉積弊遂以本折二色畫限半



運繕城備械練補軍伍守將弛縮者罰在蜀五載西陲晏然尋督兩廣至則拯民瘼戢吏奸飭戎務鼓士氣運謀調兵征勦海南黎賊土官岑濬豐湖馬山石馬等寇大致克捷斬獲賊級萬餘正德改元晉南刑部尚書評讞明恕多所全活時逆瑾煽虐蕃耻俛屈累疏乞休歸日行李蕭然家居杜門謝俗足不造城府未幾逆瑾以私憾譖蕃逮赴京師隨與劉司馬大夏同謫戍瑾伏誅詔復其官歸優游泉石者數年蕃性簡約朴素自初宦至極品一如布衣在兩廣不攜家累不以軍功錄子孫清介端方人靡有及病革呼

其子山謂曰吾薦承國恩愧乏寸益歿後勿乞贈恤  
但樹一短碣題尚書潘某之墓令子孫識其故處足  
矣卒年七十九嘉靖中詔遣官營墳諭祭今祀鄉賢  
祠墓在石門鄉廕其孫儒邳州同知

呂憲

呂憲字秉之號九栢嘉興縣人文懿公原之子生正  
統己巳年天順癸未文懿以母憂解官卒於家英  
廟念輔導功推廕憲補國子生時年甫十五成化丙  
午服闋憲廟以官恩令供事翰林明年丁亥拜中  
書舍人辛卯中順天鄉試己亥滿九載遷禮部主客

司員外郎郎中丙午以薦擢南京太僕寺少卿弘治  
癸丑改南京通政司右通政尋轉左通政丙辰擢南  
京太常寺卿庚申以母喪解官癸亥服闋再授南京  
太常寺卿正德丁卯致仕辛未卒年六十有三憲生  
秀穎讀書過目成誦未成童博洽書史操筆爲文詞  
旣受廕猶刻志問學居常手不釋卷文章務學左傳  
史記唐宋諸大家弗屑也楊一清笑舉晦翁文公譏  
東萊子長作祟之語戲之曰子之志莫高大否曰取  
法乎上斯得其中顧以不階身科目爲恨曰先公所  
期待我者詎止是哉乃疏乞應試報可言者劾其非

例 憲廟特允之有儒臣子孫有志科目之諭兵部  
事有與中舍當會行者時柄臣怙勢不復開白憲語  
楊一清曰是固不可得已因共論之得 旨悉仍其  
舊遷主客楊一清曰子攻文墨吏事非所習盍慎諸  
憲曰歐陽子文章不少夷陵之閱牘曹司故有簿案  
皆吾師也已而能聲勃勃起公卿間琉球國乞歲一  
入貢謂子之事父定省不可間其意實利於賈市以  
自便耳 廷議難之而患無詞憲請折之云若知父  
子之禮當從父命衆服其言西夷回回奏乞取廣東  
道歸國 朝廷將從之憲執不可曰西夷貢有常道

更之恐起他釁且經涉江海萬餘里勞費將不貲遂寢其奏在太僕建白處置操備馬匹免徵苜蓿種子諸四事以公務之京師又上言節財用激貪殘教戚里起宿學諸六事在太常上言立誠信習禮樂尊前王表英靈凡十有二事多見採行故事太僕馬數不得爲人所窺文卷例不覈駮以磨滅登耗無所稽考憲曰他官不相涉是也太僕所掌何事而可不與知乎乃建白凡馬政卷許太僕官三年一照覈以爲例太常祀事多所更定卷牘浩穰至或相牴牾憲採輯累朝沿革爲條若干卷事至按而行之至於今官類

以無誤 孝廟欲廣聰明於言官多所獎借淺躁者  
橫不自制公卿多折節下之憲遇之如恒禮於是相  
率論其冒進憲受之不深辨乞致仕不允再疏乞致  
仕許之且令馳驛歸而憲已先歸矣屬時逆瑾用事  
公卿側足立雖休退懼不免禍憲闔爽辯傳開口論  
天下事侃侃無顧忌意有未當詞氣激烈衆莫能屈  
然胸中畛域不喜爲逆億又不宿怨怒有犯而不校  
之風焉志存澤物而久官閑散不克自展布其政事  
終爲文學所掩而文章又爲詩所掩然卽其所之亦  
可以表見於世矣

過 璘

過璘字太璞號一齋平湖人出贅華亭顧氏因居華亭又號半松少失怙恃年十九猶混迹廛市間一旦棄去力學由本邑庠生領浙江成化乙酉鄉薦登成化丙戌進士授工部主事分司呂梁洪再管濟寧闢大爲三原王恕所推重改刑部陞員外進郎中奉詔賑饑山東還陞江西副使尋致仕歸閭朗剛直志存當世而才足濟之在刑部時許州民趙道隆爲儉人誣以妖言利其死以覲賞連及數十家御命往鞫卽日理出之在江右時豐城李民泰陷平民兄弟三人

爲劫盜繫獄十年得其情杖殺民泰而盡釋繫者一方稱爲神明家居二十餘年兩目俱病然廣筵長坐議論出入經史竟日忘倦卒之日竟無疾享年七十有九建憲副坊於華亭東門外

### 屠勲

屠勲字元勲平湖縣人舉成化己丑進士授工部主事分司清江浦督造運舟公廉有能聲三原王端毅公適總河事與督運憲臣交薦謂可大用滿考改刑部歷員外郎郎中所處皆劇曹剖決如流無滯枉每獄有疑及事干權貴者尚書林公聰皆屬之罔不協



服京城無籍子李勝誘其主之子福爲私鑄而陰令訪事者發其事福坐戍邊衆知其冤莫敢問勲曰此奴利主之產也爲直其事以福罪罪勝而歸其產又林都事素挾依附構訟蟠引不可解覈得實卒論如法直聲益起甲辰遷南大理寺丞弘治辛亥進大理右少卿本年轉左上十事若暑月疏決罪囚兩京一體五歲一遣審錄州郡刑獄多見采納漳寇煽亂上勅勲撫處至則諭其禍福誅首惡黨與悉不治甲寅擢右副都御史整飭蘭州諸郡邊備巡撫順天永平以近畿役重民食京邑尤甚疏請裁省夫役昌平

密邇 山陵供應浩繁疏停牧馬以示優卹其經略  
邊備奏分薊州密雲建昌三路屯兵緩急相援於潮  
河川築城堡虎落設險居守及增置黃花鎮營堡戍  
兵聲勢聯落虜自是不敢輕犯又奏徙熊兒峪馬營  
於便地就水泉人免病渴猪圈頭關多水患歲苦修  
築亦奏徙之南北水峪歲省役卒數百人寶坻白龍  
港產銀魚中使歲取供薦因之橫索民不能堪麻峪  
山有銀礦守臣以中旨索之皆疏言其不可 詔戒  
約中使而礦事卒不行丁巳遷刑部右侍郎尋進左  
會戚畹壽寧侯與河間民構田訟奉 旨覈勘上言

食祿之家不言利況母后誕毓之鄉而與小民爭寸地臣以爲不可 孝廟嘉納卒歸其田與民十六年內艱服闋改左副都御史復刑部左侍郎九載考績擢右都御史協理院事 武宗嗣位首上郊祀籍田幸學三事且以正心講學爲本謂初服新政宜求實意勿徒循故事爲美觀又請日以真西山大學衍義進講中外傳誦之丁卯拜刑部尚書時逆瑾用事諸司諷先關白而後奏聞勅執不從曰若是不惟三尺法可以喜怒高下亦且無 朝廷矣瑾啣之乃引疾求去加太子太保致仕 賜勅給驛歸未幾瑾敗又

八年卒贈太保謚康僖忠烈性穎敏甫成童已學貫經史有重名嘗曰士當無言不讀雖屢更劇曹恒手不釋卷尤善詩歌倡和皆一時名公其行義鄉評尤重若辨家廟昭穆置義田義塾皆可爲世法子應墳應坤俱登進士

包鼎

包鼎字汝調嘉興縣人也成化戊戌與弟鶴並舉進士鼎授兵部主事歷陞郎中乞改南部出知池州府爲政務大體不事煩苛號爲清簡郡中大治性恬退有泉石之好早年乞休弗問家人生產足不入公庭

馬昆字克昌平湖人舉成化乙未進士授永豐縣令  
清勤律已興學校斷疑獄案牘無滯峒獍猖獗殄其  
元惡境內安堵積粟賑民全活頗衆九年以卓異擢  
監察御史疏劾諸大臣不職理兩淮鹽法治濟河革  
弊恤患商民誦之陞雲南副使卒昆剛介孝友恤族  
周貧撫遺育才恩意浹洽惜位不滿德焉

馬 昆

馬昆字克昌平湖人舉成化乙未進士授永豐縣令  
清勤律已興學校斷疑獄案牘無滯峒獍猖獗殄其  
元惡境內安堵積粟賑民全活頗衆九年以卓異擢  
監察御史疏劾諸大臣不職理兩淮鹽法治濟河革  
弊恤患商民誦之陞雲南副使卒昆剛介孝友恤族  
周貧撫遺育才恩意浹洽惜位不滿德焉

劉偉

劉偉字公奇海鹽人少讀書多觀大旨覽古人興衰  
成敗得失之由毅然若欲以身濟成化甲辰舉進士  
授官行人已而選擢御史勅督兩淮鹽政兼治河道  
時九邊麟法久廢後稍變通存積十二常股十八淮  
當通泰徐沛之中豪腹者多隱占過制貧瘠者逃亡  
流徙至不得守支巨商通賄私挾乃至倍溢引額而  
頑獷白徒越境興販甚與邏人拒敵冒死不自顧所  
司屈於豪有力不得盡法乃至因循罔上而比周以  
遂其奸撓亂鹽法爲甚偉規其宿蠹裁以憲章商母

月禁竈母詭匿私鹽無逋盜公鹽母歸豪有力者一時  
鰥政爲清又以所司有阻法者不可不懲疏請于  
朝自今犯此者當戍邊 上俞之遂著爲令旣而山  
東大旱兩浙大水民不堪命偉曰國家儲峙日久帑  
藏非乏財也齊魯吳越痼瘵一體非異域也兩淮幸  
多鹽筴餘金移以活兩浙山東之民不亦可乎於是  
上書請賑報可民賴以生者不可計遠近稱其仁焉  
高郵湖地枕水國諸大湖南北相縈汪洋浩渺不下  
江淮之險每晴晝空明千艘並發忽片雲起天末則  
風激水涌波浪陡作長年黃頭至不得措手唯見帷

檣亂折舳舻漂漾商艫漕艘覆溺狂流號呼莫拯於是開裡河四十里築隄建閘俾南北道此者皆往來其中名康濟河見國漕重也民至於今賴之以免覆溺之患事竣奉命按廣西廣西與嶺南接境珍玩奇巧之物無足而至所須甚易至則與諸屬郡相誠務潔修以終令譽貪墨者功令所不赦於是簡諸羣僚得其甚者盡汰之他所激揚貞度持繡斧行百粵凜肅問民便苦一切興革大者驛聞小者條布內外庶司莫不精白承德夙夜覃慮民震動趨化而灘江桂嶺以南盡風偃矣久之擢廣東按察副使偉素敏練



精於吏治其以御史出爲方面則其事益簡卽上下  
往來案牘一一閱之不移時而盡判矣人皆服其內  
辨足智材周綜核視天下無不可爲也而意且倦游  
於正德初請老居家不與外事兀然一室終日危坐  
望之如土偶人然至其孝友廉靖懍懍有以自持動  
引繩墨與物無忤鄉評重之至比諸陳太丘云卒年  
六十九

### 陶 照

陶照字時明號一菴秀水人 敬皇帝時年甫二十  
餘與兄煦同舉於鄉繼又同舉於春官于是人稱鴈

湖二俊云始拜都水主事以母憂起改刑部錄囚蘇  
松蘇松者嘉接壤也親戚賓客交通焉人爲難之至  
則有犯悉寘之法未幾出爲廣東僉事廣東故多蠻  
徭豪猾時大盜唐大髻者起惠潮梁閏琛者起清遠  
皆聚衆萬人照察土兵陳朝亮有才識乃召朝亮入  
授以進止褻糧逮捕不煩帑藏廣中悉定戊辰以父  
憂起改湖廣庚午拜四川叅議時藍鄙作亂蜀人驚  
擾先是道過新都地衝而無城卽日命城之城畢而  
寇至人賴以安竟以平藍鄙功授從三品俸加賜金  
綺壬申以副使備兵威茂威茂古羌夷地邊郡瘠耗

而守臣徐叅將者性鷙酷日鞭撻軍吏於是羗夷聚數萬衆謀奪叅將照單騎出撫諭以威福衆泣拜解散然猶忿忿于叅將乃繩其部下以壓羗夷心而叅將者竟怏怏弗平反誣以致變議者莫能明照亦自薄其官遂居鴈湖之上者數年庚辰復官河南時制河南以憲臣監小灘允允常不足往往取足於官歲不下數萬金又總部京儲者率踰年不完責償民間幾亦數萬習弊滋甚至則立規畫謹簿書抑豪右節浮靡秋毫無犯公私兼裕焉乙酉陞雲南右布政尋陞四川左布政先是爲雲南時有盜稱大眼者鳩衆

橫行嵎峨間阻險深入歲不能下照至卽平定之於  
是 詔復賜金綺性斤斤簡勅言不出口未嘗面可  
否人至所歷乃表表以武功見在四川以繼母憂去  
又二年遭讒罷官家居幾十年迄無幾微不平之意  
嘗謂人曰布政綰司錢穀謗翕翕易起人炫廉自飭  
而吾于徐弗以外嚟當逆瑾時人有官不患不能顯  
而吾優游舊僚要之無疚耳與鄉人處油油煦和無  
問賢不肖善振施族人賻恤其死喪人咸德之平生  
無怒容雖臺輿臧獲弗嚴斥也年止六十有七

項 經

項經字誠之嘉興人襄毅公忠之長子也成化丁未  
舉進士授南京監察御史簡閱內庫內庫者豪貴所  
瀦也既至循故實稽覈羨餘無敢冒利者凡上章論  
利害之關於時政者十一事皆宛曲盡事體不務  
皦爲名出守太平府太平民貧而俗罷急爲拊循之  
一切興華務以寬簡安利爲先丁父憂解任民挽留  
者充道枳不行服除移治臨江臨與袁筠諸郡接壤  
也土寇出沒其間前有司率玩愒弗敢動民無休居  
至則立捕諸豪賊百八十人按之一郡肅然踰年大  
饑米石千錢有司方請賑經曰民饑甚矣必請而賑

是含口以待斃也賑而勿請罪在太守寧以一身活數萬人於是發府庫金數千建和糴之法民賴以存者無算而監司督賦方急經入諍曰化理民命爲重民憊矣以杖驅之是東羊加石而沉之淵直速死耳民死賦從何出太守死不奉命監司怒繼而歲大稔民感德報稱賦纚纚然入恐後矣卒爲諸郡先時中璫瑾竊柄縉紳以次納賄經耻以賂得官獨不爲附瑾啣之移汀州經曰禍止是幸矣卽日之任朞月而政盡舉卒檄以致仕歸瑾敗起江西右叅政曰吾今乃可休矣夫人處世飄風耳胡爲老而俯仰人尚作

強壯態孰與林臯自怡也乃自號怡菴嘉靖己丑年七十有八而卒

陸 淞

陸淞字文東平湖人弘治己酉鄉薦第一登庚戌進士以祖母老乞歸王端毅恕起與修大明會典成擬除翰林力辭授禮部主事歷郎中正德時藩國多踰例請乞淞皆格不行倭使宋素卿賂閹瑾求數入貢淞上疏曰夷狄去來無常非中國利且素卿本寧波人潜通外夷以邀 天朝此不可縱請執而誅之瑾怒矯制收淞下獄瑾敗累遷至光祿卿嘉靖初興疏

懇乞辨忠佞廣言路節財用言極剴切尋乞致仕卒  
淞性仁厚臨大事毅然不撓有古名臣風

沈煉

沈煉字剛夫平湖人弱冠有聲文苑由弘治己未進  
士歷任江西叅議宦轍所至豪右屏息墨吏皆望風  
引去桃園寇勢猖獗煉文臣兼武事以身殉難寧以  
凱旋居官剛介絕俗屢爲當道所不容然亦自行其  
志不以人之喜怒更其守家居睦族信友足跡不入  
公門蓋進退始終一於剛者

吳昂



吳昂字德翼海鹽人弘治乙丑舉進士授宜城知縣  
宜城人弗善耕織昂教之邑當孔道多過賓聞其清  
約無敢勤館人既三年更新建新建則寧庶人宸濠  
所居也方宸濠未敗時坐擁王號驕橫莫制日張爪  
牙索民租甚刻民不能堪遂結寨丁家山以拒之寧  
藩大謹曰新建人反諸大吏在會城者莫敢言昂獨  
以爲民率有激而然不可以反名乃昌言而進曰始  
吾疑民之敢於抗大王也乃今知民非有抗於大王  
也愚者徇財以忌生憎者勢極而生變此可以理法  
散非可以威力驅也乃入丁家山呼父老出諭諸父

老皆頓首惟命而寧藩獨懇懇然謂偏護新建人也  
已而歲大饑立抽補法以賑而全活者幾萬人未幾  
華林盜起又日夜調集兵旅以掩之境内以寧尋轉  
南刑部主事以持法謹不協於上官請告歸歸六年  
起南武選員外郎擢福建按察僉事福寧有訟妻殺  
夫者獄已成閱其詞證疑有冤私禱諸神夜夢一兒  
據人腹初不甚解乃日踪跡四方而里中有名杜福  
子者曾與其父行賈偵而知之大喜曰杜福子殺人  
明矣神所告也密捕福子至一訊而服妻得以不冤  
死古田礦盜起又擊捕追襲獲其渠魁周馬良徐黨

散去及進山東按察副使遂乞致仕歸久之復拜山東按察副使數月轉福建叅政閩故舊遊地才志易展多佳政士民愈益喜歲庚寅侯官囚逸獄持大斧利刀橫行官署首戕其方面肝腦塗地甚慘獨昂以父忌辰愍慕不出得遠其害已而進右布政使司官頗嫉之蓋藩司故多羨金昂廉無所取又峻卻人餽人惡其異已而腹誹者訛訛矣自揣不能諧世俗因譙樓震引以爲咎卽上疏請致仕疏三上得允歸之日士大夫設祖道父老攀轅留者幾萬人至不得前旣歸遂不復從章縫游混跡農漁意甚適人或狎之

亦不較晚年不涉世故及歲饑數爲請賑海堤爲患特疏於朝得專勅水利憲臣經理迄今賴保障云卒年七十五所著周禮音釋藏於家

屠 珪

屠珪字文治平湖人也父熙爲太平同知僅以一僕自隨宦邸如僧舍珪第進士授常州府推官決獄明敏謝絕饋遺擢御史當武廟南巡上疏請回鑾以光聖德嗣後疏止興作全戚畹崇聖學重經筵寬重罰皆國家大體巡廣右時徭寇方熾歲饑特甚設法糴運且增價招商禁刷禾船多所全活招降百粵

捷聞 武廟特勅獎勵云經略有方多效勤勞賜之  
金幣陞俸一級時稱爲真御史補山東副使糧運刻  
期竣事 世宗特賜羊酒以勞之致政歸囊橐蕭然  
雅意詩書足不履郡城者三十六年兄奎亦爲御史  
巡視江右累疏宸濠不軌有直聲官終江西叅議

卞 謙

卞謙嘉興人弘治末進士授江西廣信府推官辨疑  
獄理冤抑郡稱神明家居孝友嚴於義利之辨不究  
厥施而卒鄉人至今惜之

孫 璽

孫璽字朝信平湖人也正德戊辰進士令興化有豪  
徐恩入貲爲千戶與其宗人交賂權貴猾賊邑中邑  
中莫敢發璽廉知之薄戒宗人後得恩謀殺人事竟  
寘之法邑中爲快轉揚州府貳淮揚饑分賑泰州全  
活以萬計是時宸濠反江西攻安慶璽奉檄守儀真  
扼江之衝捕儀賓之僞謀者勅旌之會武廟南巡  
久次揚璽與太守蔣瑤協力調度民不知疲陞南京  
宗人府經歷以外艱歸服闋陞山東按察司僉事提  
督京畿屯餉奉命清丈皇莊草場凡奄戚所漁奪  
悉歸之民招安薊州治盜及調雲南乞歸居家孝友

睦族與人樂易不爲表襮兄壁伊府教授兄弟友愛  
子植刑部尚書

錢 錡

錢錡海鹽人正德初登進士知盱眙縣計拒流賊邑  
賴以全陞南京刑部郎中歷知臨江府有德政左調  
思南請老歸教子姪相繼登第義聞孚于鄉邦卒年  
八十二

陸 琳

陸琳字文珮平湖人正德庚午舉人知清河值歲稔  
撫濟全活數萬俗不諳紡織集老媪教之遂爲永利

家戶祝焉泊行爲天下最得擢廣東道御史貴戚歛  
手清軍湖廣以勾查逃解四字立法而隱冒肅清復  
江西道上封事十條崇聖德敬天變節供應嚴考  
察汰冗食慎刑罰後巡按四川經略西南夷躬自督  
戰大至克捷乃單騎出見開示威信諸酋感泣乞降  
會都指揮劉永昌內倚武定侯權勢與蜀府訐奏竟  
按寔抵昌罪繼補河南道與大計復論罷中貴姻黨  
墨吏隨劾權黨邊將張麟怙勢不法事不報遂出知  
撫州尋乞骸骨歸享年八十居鄉孝友謙恭絕足公  
府屢罄瓶粟及得炊必與諸弟共之人稱古君子云



趙 漢附子伊孫邦秩

趙漢字鴻逵平湖人正德辛未進士授建昌推官廉  
正公明錄重囚有冤必釋不拘成案殺人匿死者務  
廉得其情不輕縱賢譽著聞召拜給事中章數十上  
其大者若清治源消災變辨忠邪又論劾巨璫蕭敬  
谷大用崔文及邪佞陳洸等張孚敬秉政勢甚赫論  
其專職自恣及論桂翟二相出爲山西叅政數月致  
仕所著有漸齋集子伊登嘉靖壬辰進士授刑部主  
事陞南職方司員外郎御下甚肅事無留閣營卒不  
敢役私門轉武選郎尋轉車駕一切請謁槩行謝絕

惜驛迤疲奔命郵符毫不輕假出爲廣西副使以父  
諫議老上書致仕侍養時年甫四旬耳當事者移檄  
趣行而志已決隆萬間詔起用再三終不可奪惟日  
遊湖山賦詩自娛具載序芳園稿中伊子邦秩登萬  
曆丁丑進士授海門令慷慨任事興利除害不辭艱  
辛卒以焦勞成疾卒不竟其施士論惜之

陸杰

陸杰字元望平湖人淞之子正德甲戌進士授兵部  
主事武廟將南巡杰與黃輦陸鎮伏闕極諫廷杖  
四十幾絕而甦歷遷陝西鄜延兵備副使達虜大入

杰與梁遊擊督兵出戰斬戮甚多虜數歲不敢近邊  
陞廣東左布政使安南不廷上命兵部尚書毛伯  
溫督師討之用其策國王莫登庸上表請罪遷都御  
史巡撫湖廣當聖駕幸楚章聖梓官南祔杰倉卒  
供應若素定者上奇其才官至工部侍郎卒贈尚  
書

諸 僮

諸僮字揚伯嘉興人大父忠爲梧州守父敷隱居教  
授通陰陽家術僮幼孱弱多病未知學羈紲時猶逐  
里閭羣兒嬉有僧明欽博學善相人與敷友見嬉戲

謂數曰郎君清雅逼人急令讀書當貴顯於是數授之業資性穎發好學數載盡通經史百家言性尤嗜古見古人圖畫墨蹟率心注之又善通音律凡伶部詞曲無不諳其節奏暇則潛自吟哦不置對人談多雄辯時出詼諧爲文章詩詞務鈞玄發微有深潛之思四十始登第時正德丁丑授黃梅令黃梅素號難治又繼宸濠亂後民罷憊多亡匿僞以恩撫而豪狡妨民者則摧抑使不得縱民大感悅越二年以父制歸後起大名因俗而治化用大行丙戌轉刑部主事明年丁母艱起復主事歷員外郎擢福建按察僉事

總理屯政覈其故剔其姦明其疆理綜其子粒周慎  
詳密而屯政以舉丁酉進貴州叅議貴土官遇上官  
至輒有餽悉却之安宣慰者大酋也故事承蔭者必  
先行貨於所司乃敢請廉知之亟與之牒安氏不費  
一錢而襲居其職後二年擢本省按察副使持法懸  
平吏民畏懷至有繪像祀於家者辛丑上書乞歸甚  
懇致其仕歸爲人坦夷不設城府角巾綈衣襍間里  
侶親戚悛悛無甚異人視之無不可近至非禮相干  
則輒然見於色卽久要宿契竟終絕之矣性尤嚴于  
辭受取予自一介之微未嘗玩而染之故歷宦二十

五年歸橐蕭然歸而間以請謁來者卽厚賄峻絕之  
不以聽也癸卯卒六十七

### 劉玘

劉玘字南谷平湖人學行醇謹孝友之稱無間正德  
丙子鄉薦嘉靖五年授五河令蒞任歲大飢設法賑  
濟全活數千人政尚維風一時士習丕變民是以有  
前姜後劉吾得以休之謠六年課最擢南京工部主  
事卒祠名宦處爲醇儒出爲循吏至今士林景仰焉

### 沈圻

沈圻字子京平湖縣人正德六年進士除江西道御

史以忤當道降高郵州判官陞休寧知縣累陞貴州  
叅政疏請致仕

姚 參

姚參字應辰平湖人正德庚午薦京闈分教饒邑以  
經義指南諸生擢宜春令賑飢興利搏擊權橫省茶  
貢費十之九民若更生宸濠之變爲王公守仁應援  
斥諸顧望者濠卒就擒再尹桐廬尋授水部郎權稅  
荆南益持冰蘖會長子篚舉于鄉欣然挂冠歸居鄉  
約已敦族週恤故舊子篚仕至僉憲簞笈並舉鄉薦  
孫體信進士所授父產悉讓之弟衆共推之

林桂

林桂字天芳平湖人舉正德甲戌進士初授刑曹以執法忤權貴下御史獄後世宗入繼詔拔淹滯超授祠部郎首建大禮之議文忠張公然其說而上之而桂不欲自炫乃文忠特蒙異寵而桂僅以僉憲終亦寧拙無巧之明驗矣

滿正

滿正海寧衛左所正千戶正德間解軍器之京遇寇奮勇射退次滄州首寇劉六劉七臨境守臣欲遁正激以忠義適胡世寧行次正遂協守與寇持八晝夜



不能犯尚書張縉疏正功後從征開常深入被害贈  
明威將軍子潮陞指揮僉事

### 盛唐

盛唐字元陶嘉善人嘉靖十七年進士由吉安府推  
官選湖廣道御史時重建太廟有希上意者奏  
當倣周制七廟太祖太宗百世不遷立四親廟以  
憲宗爲祖興獻帝爲考唐極言其非疏入世宗震  
怒令回話本進經覽而擲地者三浹旬後始得旨  
罰俸半年邪議遂寢二十五年巡按陝西以劾仇鸞  
降湖廣布政司照磨陞國子監博士累陞湖廣副使

沈科

沈科字子進嘉善人登嘉靖甲辰進士初爲行人晉  
繕部庚戌虜薄都下大司空猝不能具牛車科旦夕  
爲治具飛輓旁集卒賴以濟甕張秋河道有聲知臨  
江勤恤民隱民尸祝之已治兵江贛平劇盜李文標  
地方勒碑記其功時宦彼中者分宜半籠而致之分  
宜子聞科才陰令人諷科使附已科正色曰某卽不  
材柰何以 天子臣爲相公私人分宜啣之詭謂銓  
部曰贛兵使以艱去當以朱某補朱分宜客也銓部  
謬以朱來及來科實無故理贛自如朱亦次且不進

司銓者度亡柰何隨轉苑馬卿左遷河南憲副有欲  
爲科謀解於分宜科微知之謝曰吾柰何遂首鼠耶  
卽柄人幸而釋我更何面目俛仰人間也卒不聽分  
宜愈啣之嗾當路論去科事親孝撫其弟最友愛生  
平磊落多大節恥一切婢阿態居官多廉惠聲待人  
輒飲以和無城府嗜學能文熟于長家言有史抄二  
十卷

吳淞

吳淞字秀東秀水人舉嘉靖丙午鄉試數上公車不  
第選知靖州州民與苗獠同編戶輸稅會山水驟漲

民溺死無算淞丞懸賞格抹一人者予十緡又躬令人置筏濟未渡者州人德之貳守九江時湖口關值水衝商舶多壞淞曰寧算錐刀而傷民命乎請于觀風使者議革之商大稱便已遷福建鹽運使同知引年歸爲人朴茂恂恂仁厚長者性不事封殖而於族黨貧乏尤好施歸田後足不躡公庭志操澹如也里中咸高其誼云

姚弘謨

姚弘謨字繼文秀水人舉嘉靖癸丑進士選庶吉士授編修恒衷質行不設城府壬戌分校禮闈慈谿袁

相國意有所不愜欲易之乃引故事爭曰異時詞臣  
無易卷者袁卿之卒左遷其後一視學兩司城所識  
拔多聞人仕至天官亞卿以病乞歸時門下士方宅  
首揆絕無書抵政府甫逾艾卒賜祭營葬贈禮部尚  
書弘謨在襁褓時父廣文君卒于官母更適乃依祖  
母徐以迄成立登第後迎母歸養克盡孝人方之范  
希文

### 馮臯謨

馮臯謨字禹卿海鹽人嘉靖庚戌進士初授刑部主  
事轉員外郎執法平反人不敢干以私尋陞江西按

察司僉事歷廣東布政司叅議時有張連之寇奉  
嚴旨切責臯謨親討督戰巨魁就擒餘黨遂解散地  
方藉以平定隨晉副使陞福建布政司叅政所至政  
聲籍甚縉紳推重生平溫粹待人如和風甘雨優游  
林下日以詩酒自娛有先民之風焉

沈伯龍

沈伯龍嘉興人字雲卿登嘉靖乙丑進士初任內江  
令有惠政時直指貪悍數伺其隙而不得及內召將  
行直指盛氣而前盡發行囊止俸金三十餘兩直指  
赧顏退邑父老子弟扶輿而出號泣不絕抵京補禮

科給事中忤新鄭出守州南會有九絲之亂九絲負險以抗伯龍語諸從事曰人臣委身事君政在今日諸君更何待耶于是諸將皆奮無不以一當百又躬自督陣親冒矢石捷聞天子賜金帛陞俸一級時番猱作叛督撫以兵五萬專屬之龍乃謂解甲未久不堪復戰遂呼猱衆諭以國威猱聞諭歡呼動地縛三渠魁以獻後修獻陵闕宦意在乾沒龍覆實其數所省十之八雖賈怨弗恤也江陵父卒諸司往吊龍獨不往竟以裁革歸歸數月復起江西隨轉山東廉訪使以積勞萎頓遂拂衣歸志行粹白里中稱爲長

者

賈名儒

賈名儒嘉興人嘉靖丙戌進士官比部抗節持法有  
考功吏受賕事逮名儒訊卽重比考功郎啣之出守  
姚安再補汝寧會世廟躬謁顯陵道南陽一時署  
篆吏重飲民貲佐供應名儒爲榜示還給汝民咸舉  
手頌德年甫踰強遂乞休優游林壑者四十年人以  
清介稱

戚元佐

戚元佐字希仲秀水人嘉靖壬戌進士文聲籍甚初



議選館詞林競推轂之忽中旨傳免後選儀部會  
穆廟登極典禮多所匡贊宗藩一疏深憂碩畫不減  
賢洛陽已陞尚寶卿告歸居家廉靖不爲請謁長于  
詩文又善書畫著有青藜閣集

### 王文祿

王文祿海鹽人舉嘉靖辛卯鄉試博學好名屢上春  
官不第刻厲愈銳以天下文章節義自命居身廉峻  
絕口居間有不平叱罵不避貴要戶田三百請編役  
如民令有不廉者勸駕公宴文祿拔劍起舞屢向之  
曰此劍能斬貪汚年七十餘應制長安步履如少壯

終其身所著丘陵學山諸書若干卷卒無子學使陳大綬檄祀學宮益異數也

呂炯

呂炯字心文崇德人舉嘉靖乙卯鄉試授泰興令不兩月致仕博學好修好友好施予晚年家日落施予無倦色善詞翰臨池多泉石之趣王世貞志其墓

卜相

卜相秀水人嘉靖壬戌進士歷官太平推官刑部主事湖廣僉事雲南叅議懸車最早年八十餘廉靖溫厚言動有坊鄉邦稱之爲古人云

屠元沐

屠元沐嘉興人嘉靖乙丑進士歷工部主事員外郎  
中管儀真張秋河道山東叅政廣西按察使右布政  
加太僕寺卿致仕年九十餘 朝命存問居官清慎  
里食杜門可望不可卽如祥麟然

馬呈圖

馬呈圖海寧衛指揮嘉靖間倭犯海鹽新塘嘴呈圖  
隨統本衛驍軍李咬任等協同把總王應麟奮勇攻  
擊生擒真倭二十四名次年四月倭首八大王等自  
青村登岸流突金山白沙灣向南劫殺所犯官軍俱

經摧敗呈圖提兵出城與賊鏖戰軍潰呈圖直入賊圍身被三十餘創殞絕今祀英烈祠

采煉

采煉海寧衛指揮嘉靖間倭寇海鹽馬呈圖先馳煉往策應兵潰煉奮不顧身血戰而死今祀英烈祠

姚弘

姚弘海寧衛指揮僉事嘉靖間倭寇侵境督軍防勦屢獲戰功後復與賊遇殺賊四十餘賊潰奔弘奮勇殺入賊巢被賊鏃死督撫題奉仍祀英烈祠

俞乾

俞乾字一清嘉靖甲辰進士授刑部主事秉公執法  
勢豪犯重辟者夜懷金賁緣中貴人以請正色斥之  
竟致之理時分宜相傾貴溪論死公監斬西市義氣  
憤激忽仆地移時甦具疏乞歸未幾卒孫重光舉萬  
曆癸酉鄉試姪孫志皋萬曆丁未進士學行表表均  
不獲永年云